



Jarduera honen bidez zera lortu nahi da: ikasleek ulertu dezatela zein zaila izan daitekeen gizarteko hainbat agenteren interes kontrajarriak bateratzea, eta helburu batera bideratzea, prozesu horretan arazoak eta irtenbideak bilatzeko konplexutasuna nabarian jarriz.

Danauko kostaldea eta Beningo portua

Gai honekin zerikusia duten arloak

- GIZARTE ZIENTZIAK.
- HIZKUNTZA.
- ETIKA.

HELBURUAK

- Kostaldea erabiltzeko modu desberdinek dituzten eraginei buruz hausnartzea.
- Kostaldeko herrien bizitza hobetuko duten irtenbideak bilatzea.

Jardueraren garapena

DANAU ETA BENIN kostaldeko bi herri dira, eta bizimodu oso desberdinak dituzte. Jarraian dituzuen ezaugarrien bidez bi herrien arteko desberdintasunak antzeman ahal izango dituzue. Horiekin eta zuen esperientziarekin bi herriak ezagutu ahal izango dituzue.



Danau Indonesiako gune turistikoa da.



Benin, Afrikako mendebaldeko kostan, oso herrialde txiroa da.

DANAU

- 15.000 biztanleko herria, udan 115.000 biztanle izaten ditu.
- Turismoa asko sustatu da, eta herritarrak nagusiki turismoaz bizi dira.
- Denda, taberna, jatetxe eta hotel ugari daude.
- Jarduera horietatik %80 udan soilik daude irekita.
- Aparkaleku ugari ditu eta automobilak bertara iristeko erraztasun handia.
- Kirol portu ederra dago.
- Hondartza bete-beteta egoten da, eta oso zaila izaten da hondartzan egoteko lekua aurkitzea.
- Prezioak oso altuak dira, batez ere udan.
- Etxebizitzak oso garestiak dira turismoaren eraginez. Horregatik, herritarrek herriaren kanpoaldera joan behar izan dute bizitzera.
- Udan ur-hornidura arazoak izaten dira, sasoi horretan jende gehiago bizi delako.
- Udan zaborra biltzeko zerbitzuak eta ordutegia zabaldu egin behar izaten dira. Hala ere, zaborra pilatu egiten da, eta gainera gaueko zarata handitu. Zabor biltegia gainezka dago eta ingurumenaren arazoak sortzen ditu.
- Langabezi-tasa oso baxua da, biztanle gehienek lana dute, industria eta turismoan.
- Herritik kanpo, turistek ez ikusteko moduan, industrialdea dago. Bertan kutsadura handia sortzen duten enpresak daude.
- Gauean giro handia dago. Horrek, ordea, zarata handia sortzen du. Gorreria goiztiar batzuk antzeman dira.
- Azken bost urteetan gauetako istiluak eta borroak asko ugaritu dira.
- Itsasoko ura kutsatuta dago, bereziki udan; izan ere, arazketa azpiegiturek ezin baitiote aurre egin biztanle kantitatearen igoerari.
- Gazteentzako aisialdia, batez ere, herriko taberna eta diskotekakoa da, bereziki udan.
- 16 urteko gazteen %40k ez ditu DBH ikasketak amaitzen, eta herriko hoteletara joaten dira lanera.

BENIN

- 1.500 biztanleko kostaldeko herria.
- Arrantza da herriko gehienek bizimodua.
- Ez dago industriarik eta arrantza atzerantz doa, hainbat arazo dela medio, bizimodu gisa.
- Biztanleen %28 langabezian dago.
- Artisautza sektorea badago, arrantzaren inguruan eta otarregintzan jarduten duena.
- Ez dago hotelik, ezta turismoa sustatzeko egitasmorik ere.
- Herrirako oinarritzekoak diren denda eta komertzioak besterik ez daude.
- Hiru taberna daude, eta horietako batek jatetxea ere badu.
- Herritar gutxi batzuk nekazaritzan eta abeltzaintzan jarduten dute, baina horrek ez du herriaren elikagai beharra asetzen.
- Herrira iritea zaila da, errepideak zaharrak baitira eta bisitara etor litezkeenentzako aparkaleku azpiegiturarik ez dago.
- Kiroldegi ona dute.
- Musika eskola dago, eta baita eskola ere 16 urte artekoentzat. Gazteen %95ek amaitzen du DBH, eta gero beste herri batera joan behar izaten dute ikasketak jarraitzeko.
- Udan jende gehixeago bizi da. Gutxi batzuk oporrak pasatzera joaten dira bertara, eta urte osoan zehar beste leku batzuetan bizi diren herritarrak eta senitartekoak ere itzultzen dira uda pasatzera.
- Hondartza ederra dute, garbi-garbia, eta ez du masifikazio arazorik izaten.
- Ur-horniduran ez dute arazorik urte osoan zehar.
- Hondakinak gaika jasotzeko sistema jarri dute. Eta herrian bertan berrerabili edo birziklatu ezin dituzten hondakinak birziklatze enpresa espezialduetara bidaltzen dituzte. Gainerakoa, herritik kanpora dagoen zabortegi kontrolatu txiki batera botatzen da.
- Gazteen aisialdia betetzen duten jarduerak kirola, diskotekak, arrantza eta gaztetxeko bilerak izaten dira, batez ere.

4 eta 6 lagun bitarteko taldeak antola itzazue

- Adieraz itzazue jarraian bi herri horien ezaugarri negatiboak eta positiboak norbanako eta gizarte mailan eta ingurumen aldetik. Ezaugarri negatiboak gorri azpimarratu eta positiboak berdez. Hori egiteko, taldean eztabaidatuko da. Taldekide bat idazkari izendatuko duzue eta horrek jasoko du taldearen iritzia.
- Azpimarratutako ezaugarriak denon artean azter itzazue. Eztabaida itzazue ezaugarri negatiboari irtenbidea emateko bururatu zaizkizuen irtenbideak edo alternatibak.
- Etxean istorio bat idatz ezazu. Istorio horretan zuk zeuk hartuko duzu parte eta bi herrietako bateko pertsonaia izango zara:
Adina: nahi duzun adina izan dezakezu. Familia: zure familia deskriba ezazu.
Lanbidea: zein den zure lanbidea. Ingurumenarekiko duzun harremana.
Zaletasunak. Harreman sozialak eta zure inguruko giroa.
- Klasean jasotako ideiak bilduz, ingurumenaren egoera positiboa deskriba ezazu, eta konpondu behar diren alderdiei irtenbidea edo alternatibak eman.
- Hausnartu ezazue aipaturiko zein aspektu aurki ditzakegu gure kostaldean.

Iturria:

CEIDA (Zuzendaritza, koordinazioa eta jarraipena) "Azterkosta". Ingurugiro Hezkuntzako materialak. Derrigorrezko Bigarren Hezkuntza. 279 eta 280 orrialdeak. Eusko Jaurlaritza. Lurralde Antolamendu, Etxebizitza eta Ingurugiro Saila. Vitoria-Gasteiz, 2.000.